



**Tužilaštvo - Tužiteljstvo Bosne i Hercegovine**  
**Тужилаштво Босне и Херцеговине**

---

**Broj: A – 279-1/24**

**Broj, 19.07.2024. godine**

Na osnovu člana 5. stav 1. Zakona o Tužilaštvu Bosne i Hercegovine („Službeni glasnik BiH“, broj 24/02, 3/03, 37/03, 42/03, 9/04, 35/04, 61/04, 97/09), člana 8. Pravilnika o unutrašnjoj organizaciji Tužilaštva Bosne i Hercegovine - službeni prečišćeni tekst - („Službeni glasnik BiH“, broj 74/22) i Smjernica VSTV-a BiH za objavljivanje tužilačkih i sudskih odluka, akata i informacija o predmetima, broj: 07-02-3-1279-3/2024 od 21.03.2024. godine, glavni tužilac Tužilaštva Bosne i Hercegovine donosi:

**OBAVEZUJUĆE UPUTSTVO**  
**ZA OBJAVLJIVANJE TUŽILAČKIH ODLUKA, AKATA I INFORMACIJA O**  
**PREDMETIMA TUŽILAŠTVA BOSNE I HERCEGOVINE**

**Član 1.**  
**(Opšte odredbe)**

- (1) Ovim Uputstvom propisuje se postupak i način objavljivanja, te vrsta i sadržaj tužilačkih odluka, akata i informacija o predmetima Tužilaštva Bosne i Hercegovine od javnog interesa (u daljem tekstu: Tužilaštva) u odnosu na: krivična djela protiv čovječnosti i vrijednosti zaštićenih međunarodnim pravom, koruptivna krivična djela definisana listom koruptivnih krivičnih djela VSTV-a BiH, krivična djela organizovanog kriminala, terorizma, pranja novca, utaje poreza, kao i ostalim krivičnim djelima u kojima postupaju tužioci Tužilaštva u kojima se utvrdi da postoji javni interes da se takve odluke i informacije čine javno dostupnim, a sve u skladu sa zakonom propisanim pravilima i u skladu sa interesima postupka, a koje će se objavljivati na web stranici Tužilaštva ili činiti dostupnim javnosti u skladu sa zakonom kojim se uređuje sloboda pristupa informacijama i obrada ličnih podataka, radi obavještanja javnosti o pojavama i problemima od opšteg značaja.
- (2) Objavljivanje tužilačkih odluka, akata i informacija o predmetima vršiti će se putem web stranice Tužilaštva BiH posredstvom saopštenja za javnost- pregleda sedmičnih dešavanja/biltena koji će se objavljivati svakog petka u 13:00 sati ili pojedinačnih saopštenja za javnost u skladu sa zakonima BiH, poštujući principe javnosti, zaštite ličnih podataka, tačnosti i blagovremenosti, jasnosti i razumljivosti, kontinuiteta, trajanja objave i unifikacije objave, jednostavnosti pristupa te transparentnosti rada Tužilaštva, uzimajući u obzir javni interes, pravo na zaštitu privatnosti i zaštitu ličnih podataka, te zaštitu interesa maloljetnika, svjedoka i oštećenog.

- (3) Tužilaštvo će obavještavati javnost o pojavama i problemima od opšteg značaja koji su zapaženi u radu, a sve u granicama i u skladu sa interesima postupka, sa posebnim akcentom na predmete od javnog interesa.
- (4) Odgovori na novinarske upite o predmetima Tužilaštva BiH dostavljati će se na način da će odgovori po zahtjevima koji budu zaprimljeni do četvrtka tekuće sedmice do 16:00 sati otpremiti u petak u 13:00 sati te iste sedmice, a upiti zaprimljeni u periodu od četvrtaka poslije 16,00 sati tekuće sedmice do četvrtka do 16:00 sati naredne sedmice otpremiti će se u petak u 13,00 sati naredne sedmice i tako u kontinuitetu.
- (5) Tužilačkim odlukama u smislu Smjernica u skladu sa ovim Uputstvom smatraju se: optužnice, naredbe o nesprovođenju istrage i naredbe o obustavi istrage.

## **Član 2.**

### **(Kriteriji ispitivanja javnog interesa)**

- (1) Kriteriji ispitivanja javnog interesa integrisani su i u zakone Bosne i Hercegovine o slobodi pristupa informacijama i zaštiti ličnih podataka te je neophodno konsultovanje istih pri svakoj obradi ličnih podataka i ispitivanju javnog interesa.
- (2) Članom (1) stav 1) Uputstva određene su vrste krivičnih predmeta za koje se u smislu Smjernica pretpostavlja da su predmeti od javnog interesa.
- (3) U svakom slučaju Tužilaštvo će provesti test javnog interesa kada se radi o predmetima iz stava (2) ovog člana kao i u drugim predmetima u kojima postupa, na način da će tužilac koji je zadužen predmetom u svakom konkretnom slučaju ispitati postojanje javnog interesa, a prema sljedećim kriterijima:
  - vrsta i težina krivičnog djela kao i predmet postupka,
  - svojstvo učesnika u postupku ( npr. imenovani/izabrani dužnosnici u sudskoj, izvršnoj i zakonodavnoj vlasti, novinari, službena lica, javna lica i sl.),
  - ostali opravdani interesi javnosti (npr. stepen društvene opasnosti, pojavni oblik kriminaliteta, zaštićeno dobro, značaj odluke za širu društvenu zajednicu i sl).

## **Član 3.**

### **(Transparentnost rada institucije)**

- (1) Proaktivna transparentnost podrazumijeva aktivno nastojanje Tužilaštva da informacije u vezi sa njegovim radom i postupanjem u konkretnim predmetima, a koje su od interesa za različite ciljne grupe, budu blagovremeno identifikovane i adekvatno objavljene bez ikakvog prethodnog zahtjeva za pristup informacijama.
- (2) Reaktivna transparentnost podrazumijeva postupanje Tužilaštva po zahtjevima za pristup informacijama, kao i postupanja po različitim upitima koji dolaze iz medija i od drugih zainteresovanih lica.

## **Član 4.**

### **(Interna distribucija i kreiranje informacija)**

Osoba ovlaštena od strane glavnog tužioca da pruža podršku glavnom tužiocu prilikom vršenja uvida u tužilačke akte će nakon što glavni tužilac izvrši uvid u optužnicu, naredbu o nesprovođenju istrage ili naredbu o obustavi istrage, koja se odnosi na neko od krivičnih djela iz člana 1. stav (1) Uputstva informaciju o navedenom dostaviti Odjelu za odnose s javnošću koji će potom od postupajućeg tužioca zatražiti relevantne informacije o tužilačkim odlukama. Nakon što postupajući tužilac utvrdi

postojanje javnog interesa i dostavi tražene informacije Odjelu za odnose sa javnošću, Odjel za odnose s javnošću će postupiti u skladu sa relevantnim odredbama Upustva u zavisnosti o kojoj vrsti tužilačke odluke se radi.

#### **Član 5.** **(Objavljivanje potvrđenih optužnica)**

- (1) Tužilaštvo može objaviti izvode iz potvrđenih optužnica u svim predmetima bez ograničenja vezanih za prirodu i težinu krivičnog djela u skladu sa svojim kapacitetima i resursima, poštujući zakone i principe definisane Smjernicama.
- (2) Izvodi iz potvrđenih optužnica koji se objavljuju, ako je riječ o predmetu od javnog interesa, sačinjavaju postupajući tužioci ili osobe koje oni odrede, a treba da sadrže:
  - a) naziv tužilaštva, broj i datum optužnice;
  - b) podatke o optuženom licu i to: ime i prezime, godina i mjesto rođenja, ako je riječ o predmetu od javnog interesa, odnosno anonimizirani podaci u ostalim predmetima. U slučaju pravnog lica, objavljuju se puni podaci o pravnom licu kako su navedeni u optužnici;
  - c) činjenični i pravni opis krivičnog djela, bez imena oštećenog/ih, svjedoka i trećih lica i drugih podataka koji mogu otkriti identitet ovih lica;
  - d) pravna kvalifikacija krivičnog djela;
  - e) prijedlog za:
    1. određivanje/produženje pritvora/mjera zabrane;
    2. određivanje mjera osiguranja oduzimanja imovinske koristi;
    3. donošenje privremene mjere osiguranja imovinskopravnog zahtjeva;
    4. izricanje mjera bezbjednosti;
- (3) Nakon sačinjavanja izvoda potvrđene optužnice od strane postupajućeg tužioca isti se dostavlja Odjelu za odnose sa javnošću, radi provođenja daljnje procedure objavljivanja izvoda.
- (4) Tužilaštvo će uz izvode iz optužnica, u predmetima od javnog interesa, objavljivati i odgovarajuća saopštenja za javnost.
- (5) Neće se objaviti dio optužnice koji sadrži imena svjedoka i oštećenih, prijedlog dokaza, rezultate istrage i dokaze koji potkrepljuju navode iz istrage.

#### **Član 6.** **(Informacije o podignutim optužnicama)**

- (1) Informacija o podignutoj optužnici može se objaviti i prije njenog potvrđivanja kroz saopštenje za javnost i to po procjeni glavnog tužioca, uz korištenje jednog od sljedećih kriterija:
  - a) predmet je izazvao poseban interes javnosti;
  - b) osumnjičeni/a je bio/la javna osoba/slужbeno lice;
  - c) podaci o osumnjičenom/oj odranije poznati javnosti;

#### **Član 7.** **(Naredbe o nesprovođenju istrage i naredbe o obustavi istrage)**

- (1) Naredbe o nesprovođenju istrage i naredbe o obustavi istrage neće se objavljivati zbog interne prirode takvih akata, već će se javnost o ovakvim vrstama tužilačkih odluka informisati posredstvom pregleda sedmičnih dešavanja/biltena, a nakon odluke o eventualno uloženom prigovoru, odnosno pritužbi na odluke.
- (2) Prilikom informisanja o ovakvim vrstama tužilačkih odluka potrebno je jasno navesti razloge donošenja odluka, a u predmetima u kojima je donesena naredba o obustavi istrage usljed nedostatka dokaza protiv osumnjičenih, informacija treba da sadrži i napomenu da se protiv tih

lica istraga može ponovo otvoriti ako se pojave nove činjenice i dokazi koji ukazuju da postoje osnovi sumnje da je lice počinilo krivično djelo.

- (3) Izuzetno, po procjeni glavnog tužioca, ove vrste tužilačkih odluka se mogu objaviti u integralnom tekstu u predmetima od javnog interesa, te ukoliko se radi o krivičnim djelima počinjenim iz mržnje ili drugim krivičnim djelima koja izazivaju veliki interes javnosti, kao i akademske i stručne zajednice.
- (4) Odjel za odnose s javnošću, nakon što zaprimi informaciju, u skladu sa članom 4., vodi računa o ispunjenosti uslova iz stava 1. ovog člana.

#### **Član 8.**

##### **(Objavljivanje ostalih tužilačkih akata)**

- (1) Ostali tužilački akti sačinjeni u toku rada na predmetima, kao što su naredbe o sprovođenju istrage, prijedlozi i naredbe izdate tokom poduzimanja radnji dokazivanja, prijedlozi za osiguranje prisustva osumnjičenog u postupku i slično, neće se objavljivati zbog interne prirode takvih akata iz razloga što isti sadrže informacije čijim se saopštavanjem osnovano može očekivati izazivanje štete za legitimne ciljeve u sprečavanju i otkrivanju kriminala, odnosno informacije koje se između ostalog tiču i dokaza, a čije izlaganje javnosti može otežati ili onemogućiti sprovođenje pojedinih istražnih radnji ili ugroziti eventualne buduće istrage u takvim predmetima.
- (2) Glavni tužilac može, po svojoj procjeni, o donošenju ovih akata informisati javnost kroz adekvatna saopštenja, rukovodeći se kriterijima koji važe za informisanje javnosti o podignutim i nepotvrđenim optužnicama.
- (3) Informacija o ostalim vrstama tužilačkih odluka se po nalogu glavnog tužioca sačinjava od strane Odjela za odnose sa javnošću prema podacima dostavljenim od strane Kabineta glavnog tužioca.

#### **Član 9.**

##### **(Objavljivanje ostalih informacija o predmetima u fazi prijave i istrage)**

- (1) Informacije o predmetima u fazi prijave i istrage u pravilu se neće proaktivno objavljivati.
- (2) Izuzetno, ako je to u interesu predmeta, objektivnog informisanja javnosti ili na zahtjev zainteresovanih lica i medija, objavit će se informacija o zaprimanju prijave i aktivnostima koje se preduzimaju u cilju donošenja tužilačke odluke.

#### **Član 10.**

##### **(Presumpcija nevinosti)**

- (1) Prilikom objave tužilačkih odluka u skladu sa ovim Uputstvom posredstvom saopćenja za javnost ili pregleda sedmičnih dešavanja/bilten, Tužilaštvo će voditi računa o presumpciji nevinosti, te koristiti pravnu terminologiju koja odgovara fazi krivičnog postupka u kojoj je donesena odluka koja se objavljuje.
- (2) Klauzula presumpcije nevinosti treba da bude sastavni dio informacije koja se objavljuje, te vidljivo istaknuta u sadržaju informacije u sljedećem obliku: „*Ovom objavom ne prejudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.*“

**Član 11.**  
**(Trajanje objave)**

- (1) Optužnice u predmetima od javnog interesa bit će objavljene u trajanju od dvije godine.
- (2) Ostale odluke, akti i informacije bit će objavljeni u trajanju do jedne godine.
- (3) Ukoliko prije isteka roka trajanja objave bude donesena pravosnažna sudska odluka, optužnica u tom predmetu ili druge informacije, uklonit će se u roku od 30 (trideset) dana od dana pravosnažnosti sudske odluke.

**Član 12.**  
**(Anonimizacija)**

- (1) Zaštita ličnih podataka iz sadržaja tužilačkih odluka, koje se objavljuju u skladu sa ovim Uputstvom, a radi zaštite identiteta osobe na koju se podaci odnose, kada je utvrđeno da ne postoji uslovi da se lični podaci čine dostupnim javnosti, a za potrebe objavljivanja tužilačkih odluka vršit će u svakom konkretnom slučaju postupajući tužilac ili osoba koju on odredi u skladu Uputstvom za anonimizaciju VSTV-a BiH broj: 07-02-3-1279-2/24 od 21.03.2024.godine.
- (2) Rukovodilac Odjela za odnose sa javnošću će prilikom pripreme pregleda sedmičnih dešavanja/biltena u kojima se sadržavaju tužilačke odluke, akti i informacije voditi posebnu brigu da u sadržaju biltena ne smiju biti sadržani podaci koji bi povrijedili prava na zaštitu privatnosti i zaštitu ličnih podataka osoba, uključujući i fotografije radi zaštite identiteta osoba, a posebno vodeći računa o zaštiti interesa maloljetnika, svjedoka i oštećenog.

**Član 13.**  
**(Završne odredbe)**

- (1) Uređivačko tijelo koje će biti zaduženo za provođenje Smjernica VSTV-a BiH bit će određeno posebnom odlukom glavnog tužioca.
- (2) Ovo Uputstvo će se objaviti na Intranetu Tužilaštva Bosne i Hercegovine i na web stranici Tužilaštva BiH, a primjenjivat će se od 20.07.2024. godine.
- (3) Stupanjem na snagu ovog Uputstva prestaje da važi Uputstvo broj: A-619/21 od 29.12.2021.godine.



**GLAVNI TUŽILAC**  
**TUŽILAŠTVA BOSNE I HERCEGOVINE**  
**Milanko Kajganić**